

Leipzig, 9. August 1564

Von Joachim Camerarius d. Ä.

Druck: Camerarius, Epistolae S. 486f.

S. D. Heri sunt mihi redditae litterae tuae et vnà cum ijs coniuncta. Tibi, mi Hieronyme, gratias ago quas possum max[imas] et sumtus impensos libenter restituam. Quàm sit mihi gratum autem hoc officium tuum, verbis exprimi non potest. Sed de hoc et his similibus aliàs. Consuli quoque vestro et salutem meis verbis dices studiosè, et ages gratias diligenter, à quo curatum scilicet est, vt liber ad me perferretur. Sanè fortuna ea quam sumus experti priùs, nonnihil me recordantem nunc quoque terrebat, cùm tu significasses mittendi consilium. Haec scripsi inter molestias et impedimenta νεφριτικῶν παθῶν, quibus non rarò affligor: et erat indictus conuentus ad celebrandam memoriam Imperatoris mortui, et facienda vota pro salute reipub[licae]. quem ego frequentare cùm non possem, haec interea exaraui, oblata statim mittendi opportunitate. De quo metu scribis, is communis tibi mecum est. γένοιτ' οὖν ὅπερ Θεῷ φίλον. Sed crede mihi, ista omnia aliter abibunt, quàm plerique existimant. τό γε μόρσιμον οὐ πάρφυκτον, ἀλλ' ἔσται χρόνος, ὁ καὶ τιν' ἀελπτίχ βαλῶν ἔμπαλιν γνώμας, τὸ μὲν δώσει, τὸ δ' οὕπω, secundum Pindarum. In his regionibus, Dei benignitate, res satis adhuc tranquillae sunt. Sed Balthicum bellum procedit cum multorum detrimentis atque pernicie. Instituta Rostochij pacificatio euanuit. In conspectu eorum qui ad hanc conuenerant, oppugnata est Suedica nauis in portu Rostochiano à Danica et sociorum classe. Ea cùm defendi non posset, ὁ ναύαρχος dissipatam vnà secum et alijs ferè 30. hominibus demersit. Postea etiam praelium in mari commissum narrarunt: de quo nihil adhuc certi habebatur. περὶ ὧν ἔγραψας, ἐκεῖνα οὐχ ὄμοίως οὔτε ιστοροῦνται, οὔτε ἐκλαμβάνονται. ἔστι δ' ὅμως οἵα προκλητικὸν, ὡς φῆς, σημῆναι πολέμου ἐμφυλίου. Nobis preces relinquuntur solae. Consilia enim nostra non audiuntur. In nostris igitur Musis acquiescamus ἀσκοῦντες τὴν εὐσεβή καὶ ἐλλόγιμον ἀρετὴν, καὶ τὰς μερίμνας ἐπιβαλώμεθα εἰς τὸν Θεόν. Litterae, quas adiunxisti nostris, reddendae curabuntur. Vale. Lipsiae. 9. die Augusti. Anno Domini 1564.